

## Transkription von Urkunde HRO 1379a

Ort, Datierung: Rostock, 1379-05-01

Signatur: Stadtarchiv Rostock, U 3, K, Schulden, IE [U 3k 1379 Mai 1] [\[online\]](#)

Inhalt: Rat der Stadt Rostock: Schuldbrief

---

Wý bōrgermestere . vnde Ratmanne to Rozstok bekennen vnde betūghen openbare in desseme  
ieghenwardigen breue . vnde dōn witlȳk / allen lūden in desser scryft . Dat wý . vnde vse nakōmelynghe  
schuldich synt van rechter schult . Deme Erbaren manne conrad / vnrowen . vnde sýnen rechten eruen  
. vyfhundert mark . vnde vif vnde drýttich mark rozstoker pe(n)nýnghe . De he vs in reden witte(n) /  
pe(n)nýnghe de ghenghe vnde gheue sýnt ghelenet vnde ghetellet heft . De wý ok vordan in openbare  
notroft vnd nvd vser vorbeno/meden stat vtegheuen . vnde ghekeret hebben . Dese vorbenomeden  
výfhundert mark . vnde vyf vn(de) drýttich mark rozstocker pe(n)nyn/ghe schulle wý vnde vse  
nakomelynghe . Deme vorbenomeden conrade vnrowen . vnde sýnen eruen in der hochtýt tō paschen .  
De / nv neghest tōkomende is bereden mit reden witten pe(n)nýnghe De ghenghe vnde gheue sýnt in  
vser vorscreuene(n) stat sunder iene/gherleye vortoch . hūlperede vnde arghelýst . Dat loue wý vor vs .  
vnde vse nakomelynghe . Deme vorbenomeden conrade vnrowen vn(de) / sýnen eruen vestliken vn(de)  
vnbrekelken tō holdende in desser scryft vnde hebb(e)n tō tughe . vser stat grote ingheseghel . van vser  
/ aller hete vn(de) wetenheyt ghehenghet laten . in dessen bref . De gheuen vnde screuen is tō  
Rozstocke . Na godes bort drutteyn / hundert iar . in deme neghene vnde souentigheste iare in  
sunte woltborghe daghe . De hilgen iunkvrowen . . /